

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH

<http://www.parlimen.gov.my>

HARI SELASA, 4 MAC 2025, PUKUL 10.00 PAGI

Bil. 9

WAKTU PERTANYAAN-PERTANYAAN MENTERI

1. PR-1541-MQT3152
Tuan Chiew Choon Man [Miri] minta **PERDANA MENTERI** menyatakan pencerahan tentang caruman KWSP untuk bukan warganegara dan bukannya cadangan ini membebankan majikan serta pada masa yang sama, mengalih perhatian KWSP daripada ditumpukan khususnya kepada simpanan persaraan warganegara.
2. PR-1541-MQT3151
Datuk Haji Awang bin Hashim [Pendang] minta **PERDANA MENTERI** menyatakan :
 - (a) berapa nilai dan kadar pertumbuhan Keluaran Dalam Negara Kasar (KDNK) sebenar bagi Malaysia untuk tahun 2022, 2023 dan 2024; dan
 - (b) berapa nilai dan kadar pertumbuhan Keluaran Dalam Negara Kasar (KDNK) nominal bagi Malaysia untuk tahun 2022, 2023 dan 2024.

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH

<http://www.parlimen.gov.my>

HARI SELASA, 4 MAC 2025, PUKUL 10.00 PAGI

Bil. 16

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1541-L28566
Dato' Seri Utama Haji Aminuddin bin Harun [Port Dickson] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah Kementerian bercadang untuk memperkenalkan sebarang pindaan undang-undang dalam meningkatkan perlindungan bagi mangsa keganasan rumah tangga, khususnya yang melibatkan wanita.
2. PR-1541-L27835
Datuk Seri Takiyuddin bin Hassan [Kota Bharu] minta **MENTERI DALAM NEGERI** menyatakan sejauh manakah keberhasilan tempoh percubaan penggunaan kod Respons Pantas (QR) untuk rakyat tempatan mulai Januari 2025 bagi sistem pelepasan imigresen di 40 lorong khas Terminal 1 dan Terminal 2 KLIA dalam menyelesaikan isu kesesakan di pintu masuk negara.
3. PR-1541-L28855
Tuan Lee Chean Chung [Petaling Jaya] minta **MENTERI PERALIHAN TENAGA DAN TRANSFORMASI AIR** menyatakan mengapa Tenaga Nasional Berhad (TNB) dibenarkan mengeksport tenaga melalui ENEGEM sedangkan mandat *Electricity Supply Handbook* TNB adalah untuk membekalkan tenaga elektrik kepada pengguna di Semenanjung Malaysia sahaja.

4. PR-1541-L28276

Dato' Indera Dr. Suhaili bin Abdul Rahman [Labuan] minta **MENTERI PERDAGANGAN DALAM NEGERI DAN KOS SARA HIDUP** menyatakan bagaimana pindaan Akta Syarikat 2024 dan Akta Perkongsian Liabiliti Terhad 2024 dijangka dapat meningkatkan tadbir urus korporat di Malaysia serta apakah manfaat pindaan Akta ini dalam membantu entiti korporat yang menghadapi masalah kewangan.

5. PR-1541-L27645

Dato' Sri Sh Mohmed Puzi bin Sh Ali [Pekan] minta **MENTERI KEWANGAN** menyatakan usaha berkesan Kerajaan dalam melindungi hak dan kepentingan rakyat dalam isu melibatkan kehilangan wang di dalam akaun dan tabungan bank berpunca daripada sekuriti lemah seperti tidak menerima OTP serta dan dinafikan hak untuk mendapatkan semula wang tersebut dari bank.

6. PR-1541-L28706

Dato' Sri Saifuddin Abdullah [Indera Mahkota] minta **MENTERI PENDIDIKAN TINGGI** menyatakan sejauh manakah Kementerian menganjurkan program pertukaran mahasiswa, di mana mahasiswa kita menuntut untuk satu tempoh masa tertentu (contohnya, satu semester) di IPT luar negara dan begitu juga sebaliknya.

7. PR-1541-L28438

Tuan Haji Manndzri bin Haji Nasib [Tenggara] minta **MENTERI LUAR NEGERI** menyatakan berikutan kejatuhan rejim Presiden Bashar al-Assad pada 8 Disember 2024, Syria kini ditadbir oleh Kerajaan interim. Apakah pendirian dan perancangan Malaysia terhadap Kerajaan interim Syria ini.

8. PR-1541-L28688

Tuan Fathul Huzir bin Ayob [Gerik] minta **MENTERI SUMBER ASLI DAN KELESTARIAN ALAM** menyatakan langkah proaktif yang diambil oleh Pasukan Petugas Kebangsaan bagi Konservasi Harimau Malaya (MyTTF) untuk melindungi dan memulihara Harimau Malaya termasuk kajian penyelidikan saintifik ke atas populasinya. Adakah Kementerian bercadang menyediakan dana khas bagi meningkatkan kawalan terhadap sindiket pemburuan haram.

9. PR-1541-L28040

Datuk Seri Utama Ir. Hasni bin Mohammad [Simpang Renggam] minta **MENTERI PERALIHAN TENAGA DAN TRANSFORMASI AIR** menyatakan bagaimana Kementerian merancang untuk menarik dan mengekalkan pelaburan swasta dalam membangunkan sektor air sebagai sektor ekonomi baharu yang dinamik dan menyumbang kepada KDNK negara.

10. PR-1541-L28171
Dato' Sri Doris Sophia anak Brodi [Sri Aman] minta **MENTERI DALAM NEGERI** menyatakan strategi Kerajaan untuk menangani sindiket penyeludupan manusia yang juga menjadi dalang kepada kemasukan PATI, termasuk langkah untuk memperketat undang-undang sedia ada dan hukuman terhadap mereka yang terlibat.
11. PR-1541-L27690
Datuk Ir. Shahelmey bin Yahya [Putatan] minta **MENTERI PENDIDIKAN TINGGI** menyatakan bagaimana Pelan Pendidikan Tinggi 2025-2035 dapat menjadi pendorong kepada penghasilan graduan tempatan yang berkredibiliti tinggi dalam bidang-bidang pekerjaan yang bersifat futuristik dengan mengambil kira kekangan tenaga pengajar yang berkepakaran serta kemiskinan yang merencatkan peluang anak-anak luar bandar untuk melanjutkan pengajian.
12. PR-1541-L27675
Puan Syerleena binti Abdul Rashid [Bukit Bendera] minta **MENTERI PEMBANGUNAN WANITA, KELUARGA DAN MASYARAKAT** menyatakan :
(a) langkah yang diambil untuk meningkatkan akses kepada diagnosis dan rawatan ADHD bagi golongan dewasa di Malaysia terutamanya dari kumpulan berpendapatan rendah; dan
(b) langkah Kementerian untuk memastikan individu dewasa dengan ADHD mendapat peluang pekerjaan inklusif dan sokongan profesional.
13. PR-1541-L28800
Datuk Dr. Ahmad Marzuk bin Shaary [Pengkalan Chepa] minta **MENTERI LUAR NEGERI** menyatakan peranan Malaysia sebagai Kepengerusian ASEAN 2025 bagi memperkukuh hubungan antara negara anggota ASEAN yang inklusif dan berdaya tahan.
14. PR-1541-L(5)00305
Puan Wong Shu Qi [Kluang] minta **MENTERI PENGANGKUTAN** menyatakan jumlah penumpang setiap laluan myBas Johor sepanjang tahun 2024, purata penumpang harian setiap laluan tersebut serta jumlah kos perbelanjaan yang ditanggung oleh Kerajaan Persekutuan untuk menyediakan 18 laluan tersebut.

[Pertanyaan di bawah PM 22(5)]

15. PR-1541-L28621

Tuan Mohd Azizi bin Abu Naim [Gua Musang] minta **MENTERI PERDAGANGAN DALAM NEGERI DAN KOS SARA HIDUP** menyatakan adakah Kementerian bercadang untuk mengatasi kenaikan harga luar biasa pada tahun 2025 bagi barangan yang sebelum ini tidak tersenarai sebagai 'Senarai Barang-Barangan Kawalan Berjadual' bagi mengurangkan beban rakyat terutama menghadapi bulan puasa dan hari raya.

16. PR-1541-L28260

Puan Rodiyah binti Sapiee [Batang Sadong] minta **MENTERI DALAM NEGERI** menyatakan pelan jangka panjang dan komitmen Kerajaan untuk menggantikan bangunan IPD berusia lebih 30 tahun yang daif dengan kompleks baharu. Adakah IPD Simunjan di Batang Sadong akan disenaraikan dalam projek penaiktarafan RMKe-13.

17. PR-1541-L28940

Datuk Haji Ahmad Amzad bin Mohamed @ Hashim [Kuala Terengganu] minta **MENTERI KEWANGAN** menyatakan :

- (a) perancangan Kerajaan terhadap rangka kerja perundangan bagi mengawal selia pinjaman yang ditawarkan sistem beli dahulu, bayar kemudian (BNPL); dan
- (b) langkah Kerajaan dalam memantau kawal selia aktiviti kredit pengguna termasuk terma dan syarat BNPL, perlindungan pengguna serta pematuhan syariah berkaitan aktiviti BNPL.

18. PR-1541-L(5)00297

Tuan Ganabatirau A/L Veraman [Klang] minta **MENTERI PENGANGKUTAN** menyatakan berapa jumlah kemalangan yang berlaku akibat 'tayar celup' dan apakah tindakan yang akan diambil terhadap mereka yang terlibat dalam pembuatan dan pengedaran 'tayar celup' yang tidak menepati syarat.

[Pertanyaan di bawah PM 22(5)]

19. PR-1541-L28937

Tuan Hassan bin Saad [Baling] minta **MENTERI LUAR NEGERI** menyatakan status terkini perbincangan dengan Singapura berhubung isu bekalan air di bawah Perjanjian Air 1961 dan 1962 serta langkah yang diambil oleh Kerajaan untuk memastikan kepentingan negara dilindungi dalam rundingan semula perjanjian tersebut.

20. PR-1541-L28412

Puan Teresa Kok Suh Sim [Seputeh] minta **MENTERI DALAM NEGERI** menyatakan :

- (a) adakah Kementerian telah menyediakan senarai semakan (*check list*) kepada pemohon kewarganegaraan di konsulat di luar negara demi memastikan kesemua permohonan kewarganegaraan memenuhi dokumentasi JPN dan KDN; dan
- (b) adakah pegawai Kedutaan Malaysia di luar negara telah menjalani latihan untuk membantu pemohon kewarganegaraan dengan lebih cekap.

21. PR-1541-L29007

Tuan Wan Ahmad Fayhsal bin Wan Ahmad Kamal [Machang] minta **MENTERI LUAR NEGERI** menyatakan :

- (a) status terkini Malaysia sebagai rakan kongsi BRICS susulan penyertaan Indonesia sebagai anggota penuh BRICS; dan
- (b) apakah pendekatan Malaysia dalam mencapai keseimbangan antara peluang meneroka potensi perdagangan dan pelaburan dengan negara anggota BRICS serta autonomi dari segi dasar luar untuk mengimbangi kuasa pada peringkat global.

22. PR-1541-L28678

Tuan Wong Chen [Subang] minta **MENTERI KEWANGAN** menyatakan sama ada Kerajaan akan mempertimbangkan untuk memberi pengecualian kepada perkhidmatan penjagaan kesihatan bersekutu atau '*allied healthcare services*' (perubatan pelengkap dan alternatif) daripada SST.

23. PR-1541-L28517

Datuk Seri Dr. Ronald Kiandee [Beluran] minta **MENTERI SUMBER ASLI DAN KELESTARIAN ALAM** menyatakan :

- (a) adakah Kementerian bercadang untuk menggubal suatu Undang-Undang Perubahan Iklim Kebangsaan; dan
- (b) langkah-langkah yang diambil bagi mengharmonikan peruntukan undang-undang berkaitan perdagangan dan cukai karbon dalam cadangan RUU berkenaan dengan perundangan di Sabah.

24. PR-1541-L28927
Tuan Mohd Sany bin Hamzan [Hulu Langat] minta **MENTERI PENDIDIKAN TINGGI** menyatakan perkembangan terkini perancangan dan penyediaan Pelan Pendidikan Tinggi Malaysia (PPTM) 2025-2035.
25. PR-1541-L28831
Datuk Wan Saifulruddin bin Wan Jan [Tasek Gelugor] minta **MENTERI DALAM NEGERI** menyatakan tindakan yang telah diambil ke atas 27 pegawai Jabatan Imigresen Malaysia yang ditangkap polis pada 26 April 2024 di Kelab Malam yang mana mereka jelas melanggar peraturan sebagai pegawai penguatkuasa sekalipun mungkin tiada kesalahan jenayah dilakukan.
26. PR-1541-L28895
Tuan Khoo Poay Tiong [Kota Melaka] minta **MENTERI PENGANGKUTAN** menyatakan :
(a) jumlah kemalangan jalan raya dan jumlah kes maut tahun 2020-2024 dan strategi untuk mengatasinya; dan
(b) siasatan kes kemalangan di KM204 Lebuhraya Utara-Selatan pada 23 Disember 2024, jumlah kemalangan di kawasan tersebut sejak 2020-2024 serta langkah penyelesaiannya.
27. PR-1541-L28776
Tuan Rushdan bin Rusmi [Padang Besar] minta **MENTERI PENDIDIKAN TINGGI** menyatakan adakah terdapat mekanisme baru penarafan *ranking* terkini Universiti Awam dan Institusi Pendidikan Tinggi serta mohon perincian aspek yang dinilai.
28. PR-1541-L27731
Tuan Sim Tze Tzin [Bayan Baru] minta **MENTERI PENGANGKUTAN** menyatakan bagaimana Kementerian mengawal selia algorithm dan kadar caj syarikat *p-hailing*. Adakah Kementerian akan menentukan harga lantai sekilometer dan kadar masa untuk menjamin pendapatan minima pekerja *p-hailing*.
29. PR-1541-L28877
Ir. Ts. Haji Khairil Nizam bin Khirudin [Jerantut] minta **MENTERI DALAM NEGERI** menyatakan jumlah tangkapan yang berkaitan dengan gejala kecelaruan jantina dan perilaku songsang seperti LGBTQ yang semakin berani dan terang-terangan di media sosial.

30. PR-1541-L(5)00311

Tuan Syahredzan bin Johan [Bangi] minta **MENTERI PERALIHAN TENAGA DAN TRANSFORMASI AIR** menyatakan statistik 5 tahun kebelakangan ini tentang bilangan kes tuntutan kerugian hasil dan amaun dituntut oleh pihak Tenaga Nasional Berhad bagi kes-kes penggunaan elektrik secara curang serta bagaimana Kementerian membuat intervensi bagi kes melibatkan golongan berpendapatan rendah, pemalsuan dokumen oleh penyewa dan sebagainya.

[Pertanyaan di bawah PM 22(5)]

31. PR-1541-L28172

Tuan Haji Bakri bin Jamaluddin [Tangga Batu] minta **MENTERI PERDAGANGAN DALAM NEGERI DAN KOS SARA HIDUP** menyatakan kaedah-kaedah pengawalan dan rekod rantai pengguna bagi minyak masak bersubsidi sebanyak 60,000 tan metrik setiap bulan.

32. PR-1541-L28842

Dato' Haji Shamsul Kahar bin Mohd Deli [Jempol] minta **MENTERI KEWANGAN** menyatakan langkah-langkah jangka pendek, sederhana dan panjang oleh Kerajaan bagi tujuan untuk mengurangkan hutang Kerajaan (FGD) pada kadar di bawah 60% daripada KDNK sebagaimana sasaran yang ditetapkan dalam Akta Kewangan Awam dan Tanggungjawab Fiskal 2023 (Akta 850).

33. PR-1541-L27890

Dato' Hajah Mumtaz binti Md Nawawi [Tumpat] minta **MENTERI PENGANGKUTAN** menyatakan sama ada Kementerian bercadang mengembalikan Suruhanjaya Pengangkutan Awam Darat (SPAD) bagi menangani peningkatan kemalangan melibatkan kenderaan berat.

34. PR-1541-L28245

Tuan Chiew Choon Man [Miri] minta **MENTERI PENGANGKUTAN** menyatakan perincian mengenai projek naik taraf Lapangan Terbang Miri yang telah diluluskan dalam Belanjawan 2025 serta jangkaan tempoh permulaan dan siap projek tersebut.

35. PR-1541-L27990

Datuk Che Mohamad Zulkifly bin Jusoh [Besut] minta **MENTERI PENGANGKUTAN** menyatakan usaha Kerajaan untuk melaksanakan polisi *Vehicle End Of Life* (VEOL) dan *Cash For Clunkers* bagi mengatasi polemik lambakan kereta terpakai di negara ini.

36. PR-1541-L28679
Tuan Wong Chen [Subang] minta **MENTERI SUMBER ASLI DAN KELESTARIAN ALAM** menyatakan status rangka kerja perlombongan nadir bumi atau '*rare-earth mining*' di Malaysia.
37. PR-1541-L28723
Tuan Riduan bin Rubin [Tenom] minta **MENTERI PERALIHAN TENAGA DAN TRANSFORMASI AIR** menyatakan apakah tindakan segera Kementerian dalam menangani krisis hakisan di Sungai Tenom memandangkan permohonan penstabilan sungai oleh Jabatan Pengairan dan Saliran telah dibuat sejak RMKe-11 dan RMKe-13, namun sehingga kini masih tiada tindakan konkrit.
38. PR-1541-L28851
Tuan Lee Chean Chung [Petaling Jaya] minta **MENTERI KEWANGAN** menyatakan langkah Kerajaan bagi mengawal kenaikan premium insurans kenderaan bagi mengurangkan beban khususnya kewangan golongan muda.
39. PR-1541-L28136
Datuk Iskandar Dzulkarnain bin Abdul Khalid [Kuala Kangsar] minta **MENTERI PENGANGKUTAN** menyatakan kadar keberkesanan keseluruhan mengenai pelaksanaan prosedur pemberian mata demerit di bawah Sistem Kesalahan Jalan Raya (Kejara) dan apakah bentuk kajian semula yang akan dilaksanakan oleh Kementerian bagi menambahbaik sistem ini.
40. PR-1541-L28669
Tuan Tan Kok Wai [Cheras] minta **MENTERI DALAM NEGERI** menyatakan apakah saluran, tatacara, kaedah, dan peraturan yang ada untuk orang awam untuk mengemukakan rayuan di bawah Seksyen 16 Akta Perhimpunan Awam 2012. Senaraikan jumlah kes rayuan yang telah diterima sejak Akta ini diwartakan.
41. PR-1541-L28634
Datuk Larry Soon @ Larry Sng Wei Shien [Julau] minta **MENTERI PERALIHAN TENAGA DAN TRANSFORMASI AIR** menyatakan apakah perkembangan terkini berkenaan projek atau perjanjian penjualan tenaga elektrik dari Sarawak ke Semenanjung Malaysia dan Singapura.

42. PR-1541-L28782

Datuk Lo Su Fui [Tawau] minta **MENTERI PERALIHAN TENAGA DAN TRANSFORMASI AIR** menyatakan bila peruntukan pelaksanaan pembinaan jambatan baru Jalan Apas Batu 2 yang tersenarai dalam Projek Rancangan Tebatan Banjir Fasa 1A. Jambatan ini tidak dapat digunakan selepas kerja pembesaran sungai dilaksanakan sepenuhnya yang menjejaskan keselamatan dan kehidupan 500 ribu penduduk.

43. PR-1541-L28330

Dato' Sri Dr. Haji Ismail bin Haji Abd. Muttalib [Maran] minta **MENTERI PERDAGANGAN DALAM NEGERI DAN KOS SARA HIDUP** menyatakan :

- (a) apakah pihak Kementerian pasti akan ketirisan diesel di sempadan tidak berlaku lagi setelah penyasaran subsidi diesel dilaksanakan; dan
- (b) mekanisme bagi melaksanakan penguatkuasaan jangka masa panjang untuk memastikan perkara ini tidak berulang.

44. PR-1541-L27712

Tuan William Leong Jee Keen [Selayang] minta **MENTERI DALAM NEGERI** menyatakan adakah pihak PDRM bersedia untuk mengoperasikan Artikel 13 Konvensyen Tentang Hak Orang Kurang Upaya (Convention on the Rights of Persons with Disabilities - CRPD), terutamanya dalam proses pengendalian OKU di kaunter aduan atau proses interegosasi.

45. PR-1541-L28153

Tuan Ahmad Tarmizi bin Sulaiman [Sik] minta **MENTERI PENGANGKUTAN** menyatakan :

- (a) langkah Kementerian untuk memastikan kepentingan domestik terus dilindungi dalam pengurusan lapangan terbang Malaysia khususnya isu pemilikan MAHB yang melibatkan penjualan saham kepada entiti asing ; dan
- (b) pelan untuk memastikan syarikat penerbangan mengamalkan ketelusan dalam penetapan harga tiket penerbangan bagi mengelakkan eksploitasi pengguna.

46. PR-1541-L28780

Datuk Lo Su Fui [Tawau] minta **MENTERI PERALIHAN TENAGA DAN TRANSFORMASI AIR** menyatakan jaminan untuk membesarkan muara Sungai Kinabutan Kecil, serta segera mempercepatkan Projek Rancangan Tebatan Banjir Lembangan Tawau, Sungai Tawau, Sabah (Fasa 1B), bagi mengatasi masalah banjir yang berlaku di kawasan Bandar Tawau yang mengancam keselamatan dan kehidupan 500 ribu penduduk yang berlaku lebih 4 kali setahun.

47. PR-1541-L27870

Datuk Haji Awang bin Hashim [Pendang] minta **MENTERI DALAM NEGERI** menyatakan status terkini siasatan terhadap permohonan pihak Bangladesh termasuk perintah ekstradisi terhadap pengasas Bestinet serta tindakan susulan yang telah diambil oleh pihak Kementerian ekoran pelanjutan kontrak Bestinet Sdn. Bhd. selama 3 tahun.

48. PR-1541-L28668

Tuan Kesavan A/L Subramaniam [Sungai Siput] minta **MENTERI KEWANGAN** menyatakan berapa jumlah terkini Wang Tak Dituntut (WTD). Apakah proses untuk menuntut WTD dan apakah langkah-langkah yang sedang diambil oleh Kerajaan untuk memaklumkan mengenai WTD kepada pemilik WTD atau waris mereka.

49. PR-1541-L28032

Dato' Wira Dr. Ku Abd Rahman bin Ku Ismail [Kubang Pasu] minta **MENTERI PENGANGKUTAN** menyatakan :

- (a) langkah yang akan diambil oleh Kementerian bagi mencegah kemalangan seperti di lebuh raya pada 24 Disember 2024 akibat tayar tercabut daripada lori tangki tidak berulang lagi; dan
- (b) tindakan yang akan diambil terhadap PUSPAKOM dan Kartel yang bersekongkol meluluskan kenderaan yang diperiksa.

50. PR-1541-L28806

Tuan Chow Yu Hui [Raub] minta **MENTERI DALAM NEGERI** menyatakan status siasatan kes kematian Teoh Beng Hock memandangkan Mahkamah Tinggi Kuala Lumpur pada November 2024 telah memerintahkan PDRM untuk menyiapkan siasatan dalam tempoh 8 bulan.

51. PR-1541-L28211

Tuan Shaharizukirnain bin Abd. Kadir [Setiu] minta **MENTERI PENGANGKUTAN** menyatakan :

- (a) langkah-langkah yang diambil Kementerian untuk mengatasi isu kekurangan pemandu bas dalam industri pengangkutan awam; dan
- (b) kesediaan Kementerian untuk mengkaji semula struktur kos bagi mendapatkan lesen Kelas E dan Lesen Vokasional Kenderaan Perkhidmatan Awam (PSV) bagi memudahkan calon pemandu terutamanya B40 memasuki industri ini.

52. PR-1541-L29069

Tuan Mordi Bimol [Mas Gading] minta **MENTERI SUMBER ASLI DAN KELESTARIAN ALAM** menyatakan langkah yang sedang diambil oleh Kementerian untuk menyokong pembangunan sektor perlombongan di Sarawak, khususnya bagi memastikan potensi projek perlombongan emas di Bau yang memiliki simpanan emas bernilai RM24.3 bilion ini dilaksanakan secara lestari tanpa menjejaskan ekosistem kawasan sekitar.

53. PR-1541-L28632

Datuk Larry Soon @ Larry Sng Wei Shien [Julau] minta **MENTERI DALAM NEGERI** menyatakan apakah peranan Kerajaan Negeri Sabah dan Sarawak dalam menangani isu *statelessness* dan bagaimana Kerajaan Persekutuan bekerjasama dengan Kerajaan negeri untuk menyelesaikan masalah ini.

54. PR-1541-L28732

Datuk Willie anak Mongin [Puncak Borneo] minta **MENTERI DALAM NEGERI** menyatakan sempadan Sabah dan Sarawak akan terus dipertahankan di samping mempertingkatkan kecekapan serta keberkesanan kawalan di pintu masuk antarabangsa. Apakah status pembinaan pos keselamatan di Kampung Sapit, Padawan dan status terkini pembinaan pos keselamatan di sempadan Sabah dan Sarawak.

55. PR-1541-L29173

Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI PERALIHAN TENAGA DAN TRANSFORMASI AIR** menyatakan rancangan Kementerian untuk mengurangkan masalah limpahan air daripada saluran parit-parit di kawasan rendah khususnya di Kg. Matang, Kg. Bt 8 dan Kg. Bt 9 Bukit Gantang yang menjejaskan hasil tanaman kontan serta Kg. Jawa di Terong, Perak.

56. PR-1541-L29148

Tuan Pang Hok Liong [Labis] minta **MENTERI DALAM NEGERI** menyatakan apakah langkah-langkah yang diambil oleh Kementerian dan pihak berkuasa dalam usaha menjaga dan memperkasa keselamatan pengguna jalan terutamanya pejalan kaki serta mengurangkan masalah kesesakan di Johor-Singapore Causeway.

57. PR-1541-L27945

Komander Nordin bin Ahmad Ismail TLDM (Bersara) [Lumut] minta **MENTERI DALAM NEGERI** menyatakan status perolehan *Multi Purpose Mission Ship* untuk Agensi Penguatkuasaan Maritim Malaysia.

58. PR-1541-L28823

Tuan Suhaizan bin Kaiat [Pulai] minta **MENTERI SUMBER ASLI DAN KELESTARIAN ALAM** menyatakan status keberkesanan projek pemetaan dan penilaian sumber air bawah tanah negara bagi menangani kesan perubahan iklim yang kini menjadi semakin meruncing. Apakah telah dirancang atau dilaksanakan projek air bawah tanah. Apakah air bawah tanah ini ekonomik untuk digunakan di Malaysia.

59. PR-1541-L28661

Datuk Wetrom bin Bahanda [Kota Marudu] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah terdapat skim atau program kewangan yang boleh dimohon bagi mereka yang miskin dan kurang berkemampuan selain daripada bantuan kewangan secara bulanan yang diberikan kepada mereka bagi membantu mereka keluar daripada kategori kemiskinan dan berdikari terutama bagi kawasan luar bandar seperti Kota Marudu.

60. PR-1541-L27617

Tuan Kalam bin Salan [Sabak Bernam] minta **MENTERI PENGANGKUTAN** menyatakan berapa jumlah kes kemalangan jalan raya berpunca daripada warga emas umur 65 tahun ke atas berbanding pemandu mabuk. Mengapa warga emas perlu melalui penilaian kompetensi dan kesihatan untuk memperbaharui lesen memandu.

61. PR-1541-L29086

Tuan Lim Guan Eng [Bagan] minta **MENTERI PENGANGKUTAN** menyatakan kos, jadual kerja dan skop projek pembesaran Lapangan Terbang Antarabangsa Pulau Pinang serta sama ada bilangan peningkatan penumpang yang ketara akan memerlukan projek pembesaran sekali lagi.

62. PR-1541-L28001
Tuan Zahari bin Kechik [Jeli] minta **MENTERI PENGANGKUTAN** menyatakan berapa jumlah kemasukan *van tour* dari Thailand yang keluar masuk melalui laluan di ICQS Rantau Panjang, ICQS Bukit Bunga dan ICQS Pengkalan Kubor dari tahun 2018 hingga 2024.
63. PR-1541-L28544
Tuan Cha Kee Chin [Rasah] minta **MENTERI DALAM NEGERI** menyatakan :
(a) jumlah kerugian dalam Ringgit Malaysia (RM) akibat perjudian dalam talian dan penipuan atas talian setiap tahun bagi 2019 ke 2024; dan
(b) jumlah suspek yang telah didakwa dan disabitkan dengan kesalahan kerana jenayah atas talian.
64. PR-1541-L28975
Dato' Hajah Siti Zailah binti Mohd Yusoff [Rantau Panjang] minta **MENTERI PEMBANGUNAN WANITA, KELUARGA DAN MASYARAKAT** menyatakan fungsi dan peranan Jawatankuasa Pemandu Pembangunan Pelan Tindakan Dasar Kanak-Kanak Negara dalam memastikan masa depan kanak-kanak terjamin.
65. PR-1541-L29053
Puan Isnaraissah Munirah Majilis [Kota Belud] minta **MENTERI PENDIDIKAN TINGGI** menyatakan :
(a) status terkini pembinaan Politeknik Kota Belud; dan
(b) status terkini program pengajian undang-undang di Sabah yang sehingga kini belum ditawarkan oleh mana-mana IPT di Sabah.
66. PR-1541-L28813
Tuan Haji Wan Hassan bin Mohd Ramli [Dungun] minta **MENTERI PEMBANGUNAN WANITA, KELUARGA DAN MASYARAKAT** menyatakan inisiatif Kementerian meningkatkan sokongan kebajikan kepada golongan ibu tunggal dan golongan miskin agar mereka mendapat bantuan yang lebih sistematik dan berterusan untuk merealisasikan matlamat sifar miskin tegar dalam negara.

67. PR-1541-L28636

Tuan Haji Yusuf bin Abd. Wahab [Tanjong Manis] minta **MENTERI PERALIHAN TENAGA DAN TRANSFORMASI AIR** menyatakan apakah tindakan Kementerian untuk melindungi harta benda dan infrastruktur awam yang rosak disebabkan oleh hakisan pantai yang terjadi semasa fenomena air pasang besar dan Monsun Timur Laut baru-baru ini. Apakah langkah-langkah pencegahan yang akan diambil oleh Kementerian supaya kesan kerosakan ini dapat dikurangkan.

68. PR-1541-L28275

Dato' Indera Dr. Suhaili bin Abdul Rahman [Labuan] minta **MENTERI DALAM NEGERI** menyatakan berapa nisbah peratus pelancong daripada China yang masuk ke Malaysia seramai 3.4 juta yang masih gagal dikesan dan tiada rekod meninggalkan Malaysia.

69. PR-1541-L29182

Tuan Chong Chieng Jen [Stampin] minta **MENTERI DALAM NEGERI** menyatakan status siasatan atas pengubahan wang haram yang melibatkan Ketua Pegawai Eksekutif (CEO) TV Sarawak, sebuah syarikat yang dimiliki Kerajaan Sarawak.

70. PR-1541-L28641

Dato' Rosol bin Wahid [Hulu Terengganu] minta **MENTERI SUMBER ASLI DAN KELESTARIAN ALAM** menyatakan langkah yang telah dan akan diambil oleh Kementerian untuk mengatasi isu serangan haiwan liar seperti gajah, harimau dan beruang yang semakin kerap berlaku termasuk di Terengganu dan telah menyebabkan banyak kerugian tanaman, kecederaan dan kehilangan nyawa.

71. PR-1541-L28609

Puan Vivian Wong Shir Yee [Sandakan] minta **MENTERI KEWANGAN** menyatakan bagaimana Kementerian bercadang untuk menangani peningkatan kos premium insurans yang semakin melonjak di Malaysia.

72. PR-1541-L28537

Dato' Seri Dr. Shahidan bin Kasim [Arau] minta **MENTERI SUMBER ASLI DAN KELESTARIAN ALAM** menyatakan langkah-langkah konkrit yang sedang diambil oleh Kementerian untuk mencegah serta membanteras aktiviti pencerobohan hutan secara haram di Malaysia terutamanya di Pahang seperti hutan di Cameron Highlands, Rompin, Lipis dan lain-lain kawasan yang berkaitan.

73. PR-1541-L28482
Puan Young Syefura binti Othman [Bentong] minta **MENTERI KEWANGAN** menyatakan status projek-projek yang dijalankan di kesemua 43 kampung yang terpilih di dalam Program Kampung Angkat Madani 2024 dan apakah perancangan Kementerian untuk menambah baik pelaksanaan bagi 200 Kampung Angkat Madani terpilih bagi tahun 2025.
74. PR-1541-L29061
Dr. Radzi Jidin [Putrajaya] minta **MENTERI KEWANGAN** menyatakan secara terperinci skop peluasan Cukai Jualan dan Perkhidmatan (SST) yang bakal dilaksanakan mulai bulan Mei 2025 termasuk item yang ditakrif sebagai bukan keperluan asas serta senarai perkhidmatan yang akan terkesan dengan peluasan skop tersebut.
75. PR-1541-L28614
Puan Vivian Wong Shir Yee [Sandakan] minta **MENTERI DALAM NEGERI** menyatakan sama ada Kementerian bercadang untuk menyediakan satu lagi pejabat Jabatan Pendaftaran Negara (JPN) yang lebih luas bagi mengurangkan kesesakan di pejabat JPN yang sedia ada di Wisma Persekutuan Sandakan ketika ini.
76. PR-1541-L28970
Dato' Seri Amirudin bin Shari [Gombak] minta **MENTERI PENGANGKUTAN** menyatakan kesediaan Kerajaan untuk memberikan ruang kepada negeri-negeri untuk mengusahakan jajaran rel yang merentasi satu negeri ke negeri yang lain. Berapa peningkatan peratus pengguna pengangkutan awam berbanding kenderaan peribadi yang ingin dicapai oleh Kerajaan pada tahun 2025.
77. PR-1541-L28949
Tan Sri Haji Abdul Hadi bin Awang [Marang] minta **MENTERI KEWANGAN** menyatakan apakah komitmen Kerajaan Persekutuan dalam memastikan pengagihan hasil petroleum yang adil dan saksama merentas negeri dan wilayah serta status tuntutan pembayaran royalti petroleum kepada negeri-negeri pengeluar minyak dan gas sehingga kini.
78. PR-1541-L29206
Tuan Yuneswaran A/L Ramaraj [Segamat] minta **MENTERI KEWANGAN** menyatakan bagaimana Kementerian merancang untuk menerapkan dasar fiskal yang lebih progresif yang tidak hanya berfokus kepada pembangunan pusat-pusat ekonomi bandar tetapi juga memperkukuh daya saing ekonomi luar bandar dengan memperkenalkan insentif cukai yang menyokong pelaburan dalam industri asas tani dan ekonomi digital di Segamat.

79. PR-1541-L28586

Datuk Ali anak Biju [Saratok] minta **MENTERI KEWANGAN** menyatakan jumlah subsidi diesel kepada Sabah dan Sarawak sejak pemakluman pengecualian pada Jun 2024 daripada perlaksanaan dasar penyasaran subsidi diesel negara dan adakah Kerajaan akan mengekalkan atau memansuhkan pengecualian ini pada masa yang akan datang.

80. PR-1541-L27873

Datuk Hajah Siti Aminah binti Aching [Beaufort] minta **MENTERI LUAR NEGERI** menyatakan langkah yang diambil oleh Malaysia dalam memperkasa ASEAN dengan Majlis Kerjasama Teluk (GCC) yang mampu menjadi blok baharu serta memberi impak besar kepada ekonomi dunia.

81. PR-1541-L28284

Dato' Seri Ir. Dr. Ahmad Samsuri Bin Mokhtar [Kemaman] minta **MENTERI PENDIDIKAN TINGGI** menyatakan apakah Indeks Prestasi Utama (KPI) yang dibuat oleh pihak Kementerian bagi mencapai Lima Fokus Utama KPT dan sejauh manakah fokus-fokus ini akan diberikan tumpuan terutamanya melibatkan golongan mahasiswa.

82. PR-1541-L29134

Tuan Lim Lip Eng [Kepong] minta **MENTERI KEWANGAN** menyatakan mengapa KWSP menjual saham MAHB pada harga rendah sekitar RM6.74 sesaham pada Januari 2023, tetapi membeli semula saham tersebut beberapa bulan kemudian melalui tawaran awam pada harga jauh lebih tinggi, iaitu RM11 sesaham. Berapa jumlah kerugian yang ditanggung oleh KWSP dan pihak yang bertanggungjawab meluluskan transaksi ini.

83. PR-1541-L27755

Datuk Seri Panglima Dr. Jeffrey Gapari Kitingan [Keningau] minta **MENTERI KEWANGAN** menyatakan rancangan tambahan dan peruntukan tambahan khusus pada 2025 untuk membangun infrastruktur di Sabah yang jauh ketinggalan berbanding Semenanjung Malaysia terutamanya bekalan elektrik, bekalan air luar bandar, jalan raya dan liputan internet yang di bawah tanggungjawab Kerajaan.

84. PR-1541-L27999

Tuan Chow Kon Yeow [Batu Kawan] minta **MENTERI PERALIHAN TENAGA DAN TRANSFORMASI AIR** menyatakan status projek-projek di Pulau Pinang:

- (a) projek pemuliharaan Sungai Juru dan pembinaan *outfall* dan struktur cegah hakisan pantai Batu Feringghi dan Tanjung Bunga; dan
- (b) pembinaan struktur cegah hakisan pantai di Pengkalan Nelayan Paramount.

85. PR-1541-L27762
Datuk Seri Panglima Dr. Jeffrey Gapari Kitingan [Keningau] minta **MENTERI PENGANGKUTAN** menyatakan perancangan Kementerian untuk mengurangkan kadar kemalangan khasnya yang membawa maut kepada penunggang motosikal yang diakibatkan oleh pemotongan atau pemintasan kenderaan lain.
86. PR-1541-L28083
Dato' Haji Mohd Suhaimi bin Abdullah [Langkawi] minta **MENTERI DALAM NEGERI** menyatakan berapa ramai warga Rohingya yang telah menceroboh Langkawi sejak 2021 hingga kini, dan apakah langkah-langkah yang sedang diambil Kerajaan untuk membendung pencerobohan dan perdagangan manusia yang menjadikan Langkawi sebagai destinasi.
87. PR-1541-L27986
Datuk Seri Panglima Madius Tangau [Tuaran] minta **MENTERI PENGANGKUTAN** menyatakan apakah langkah-langkah dalam memastikan sistem pengangkutan udara di negara ini sentiasa dalam keadaan baik bagi mengurangkan atau mengelakkan risiko berlakunya kejadian pesawat terhempas seperti kejadian di beberapa negara pada penghujung tahun 2024.
88. PR-1541-L27821
Dato' Haji Abdul Khalib bin Abdullah [Rompin] minta **MENTERI PERALIHAN TENAGA DAN TRANSFORMASI AIR** menyatakan strategi dan pelan tindakan Kementerian untuk memastikan pembekalan sumber tenaga yang mencukupi untuk memenuhi keperluan industri kecerdasan buatan (AI) di masa hadapan.
89. PR-1541-L27800
Dato' Indera Mohd Shahar bin Abdullah [Paya Besar] minta **MENTERI KEWANGAN** menyatakan :
(a) apakah strategi yang dilakukan untuk menangani hutang isi rumah yang meningkat disebabkan oleh pinjaman perumahan; dan
(b) apakah mekanisme bagi memastikan harga rumah sejajar dengan paras pendapatan median.
90. PR-1541-L27886
Dato' Dr. Haji Alias bin Razak [Kuala Nerus] minta **MENTERI PERDAGANGAN DALAM NEGERI DAN KOS SARA HIDUP** menyatakan kajian mengenai mekanisme Kerajaan bagi mengawal harga barang selepas penyasaran subsidi petrol RON95 yang akan dilaksanakan pertengahan tahun ini.

91. PR-1541-L28540

Tuan Sivakumar Varatharaju Naidu [Batu Gajah] minta **MENTERI KEWANGAN** menyatakan kesan dan keberkesanan pelbagai program bantuan kos sara hidup kepada golongan B40 dan M40 serta strategi baharu yang akan diambil bagi menangani peningkatan kos barang keperluan asas terutamanya di kawasan luar bandar.

92. PR-1541-L27839

Tuan Sabri bin Azit [Jerai] minta **MENTERI KEWANGAN** menyatakan pendirian Kerajaan Persekutuan dalam mempertimbangkan permohonan Kedah sebanyak RM200 juta bagi mengekalkan kawasan sawah padi selaras dengan titah Sultan Kedah, Sultan Sallehuddin Sultan Badlishah tahun lalu kepada Kerajaan.

93. PR-1541-L27962

Datuk Seri Ir. Dr. Wee Ka Siong [Ayer Hitam] minta **MENTERI KEWANGAN** menyatakan pandangan Kerajaan mengenai trend penurunan Indeks Pengurus Pembelian (PMI) Malaysia selama tujuh bulan berturut-turut sehingga Disember 2024 dan apakah perancangan Kerajaan bagi menangani penyusutan sektor pembuatan negara bagi tahun 2025.

94. PR-1541-L27661

Dato' Sri Tuan Ibharim bin Tuan Man [Kubang Kerian] minta **MENTERI KEWANGAN** menyatakan :

- (a) jumlah dan lokasi kampung yang telah dijadikan Kampung Angkat MADANI di bawah Belanjawan 2024 mengikut agensi dan Kementerian; dan
- (b) manfaat yang diperoleh oleh penduduk di Kampung Angkat MADANI.

95. PR-1541-L27915

Ir. Ts. Zahir bin Hassan [Wangsa Maju] minta **MENTERI PERALIHAN TENAGA DAN TRANSFORMASI AIR** menyatakan menerusi Rancangan Malaysia Ke-12, di bawah Tema 3, terdapat satu hasrat Kerajaan iaitu mempergiat penerimgunaan pengurusan sumber air bersepadu (IWRM). Di penghujung RMKe-12 sekarang, sejauh manakah kemajuan pelaksanaannya berbanding sasaran awal yang telah ditetapkan. Sekiranya tersasar, apakah tindakan Kerajaan.

96. PR-1541-L28324

Tuan Haji Mohd Syahir bin Che Sulaiman [Bachok] minta **MENTERI KEWANGAN** menyatakan langkah Kerajaan menangani cabaran pelaksanaan subsidi petrol dan diesel secara bersasar di kawasan luar bandar yang menghadapi kekurangan infrastruktur digital, sedangkan penduduk di kawasan ini adalah antara yang paling memerlukan subsidi bagi tujuan pengangkutan dan pertanian.

97. PR-1541-L28376

Tuan Oscar Ling Chai Yew [Sibü] minta **MENTERI LUAR NEGERI** menyatakan senarai terperinci obligasi-obligasi dan perjanjian-perjanjian yang perlu ditanggung dan diratifikasi oleh Malaysia selepas menjadi rakan kongsi BRICS.

98. PR-1541-L28600

Dato' Seri Hamzah bin Zainudin [Larut] minta **MENTERI PERALIHAN TENAGA DAN TRANSFORMASI AIR** menyatakan apakah tindakan yang akan diambil terhadap ahli lembaga TNB selepas membuat pengumuman palsu kenaikan tarif elektrik oleh TNB yang melanggar obligasi Penzahiran Maklumat Material di bawah Peraturan Suruhanjaya Sekuriti.

99. PR-1541-L27627

Tuan Hassan bin Abdul Karim [Pasir Gudang] minta **MENTERI LUAR NEGERI** menyatakan jaminan Kerajaan Persekutuan bahawa perjanjian yang ditandatangani untuk JS-SEZ berserta 6 MOU dan *letter of intent* pada 7 Januari 2025 antara Perdana Menteri Dato' Seri Anwar Ibrahim dan Perdana Menteri Singapura, Lawrence Wong meneliti untuk menjaga kepentingan nasional Malaysia dan Johor dari aspek kedaulatan Malaysia.

PADA PERMULAAN URUSAN MESYUARAT
MENGEMUKAKAN RANG UNDANG-UNDANG KERAJAAN
UNTUK BACAAN KALI YANG PERTAMA

1. Menteri di Jabatan Perdana Menteri

- * Rang Undang-Undang Iltizam Kecekapan Perkhidmatan Kerajaan 2025.

2. Menteri Ekonomi

- * Rang Undang-Undang Pemerangkapan, Penggunaan dan Penyimpanan Karbon 2025.

3. Menteri Perumahan dan Kerajaan Tempatan

- * Rang Undang-Undang Pengurusan Sisa Pepejal dan Pembersihan Awam (Pindaan) 2025.

4. Menteri Perumahan dan Kerajaan Tempatan

- * Rang Undang-Undang Kerajaan Tempatan (Pindaan) 2025.

5. Menteri Perumahan dan Kerajaan Tempatan

- * Rang Undang-Undang Jalan, Parit dan Bangunan (Pindaan) 2025.

6. Menteri Kewangan

- * Rang Undang-Undang Kumpulan Wang Simpanan Pekerja (Pindaan) 2025.

7. Menteri Kewangan

- * Rang Undang-Undang Kredit Pengguna 2025.

8. Menteri Peralihan Tenaga dan Transformasi Air

- * Rang Undang-Undang Suruhanjaya Tenaga (Pindaan) 2025.

9. Menteri Peralihan Tenaga dan Transformasi Air

- * Rang Undang-Undang Bekalan Elektrik (Pindaan) 2025.

* Menandakan bahawa Rang Undang-undang ini akan dibawa pada semua peringkat di mesyuarat ini.

ATURAN URUSAN MESYUARAT DAN USUL-USUL

- | | | | |
|----|-----------------|--|-------------------------------|
| 1. | (D.R.5/2025) | Rang Undang-Undang Perlembagaan (Pindaan) 2025. | Bacaan Kali Yang Kedua |
| | | [Perdana Menteri] | |
| 2. | (D.R.4/2025) | Rang Undang-Undang Perkhidmatan Parlimen 2025. | “ |
| | | [Perdana Menteri] | |
| 3. | (D.R.2/2025) | Rang Undang-Undang Perkhidmatan Bomba (Pindaan) 2025. | “ |
| | | [Menteri Perumahan dan Kerajaan Tempatan] | |
| 4. | (D.R.19/2024) | Rang Undang-Undang Mufti (Wilayah-Wilayah Persekutuan) 2024. | “ |
| | | [Perdana Menteri] | |
| 5. | (D.R.47/2024) | Rang Undang-Undang Suruhanjaya Komunikasi dan Multimedia Malaysia (Pindaan) 2024 - Menyambung semula perbahasan atas masalah “Bahawa Rang Undang-Undang ini dibacakan kali yang kedua sekarang,” (10 Disember 2024) | |
| | | [Menteri Komunikasi] | |

6. PR-1541-U(27)369

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk merangka dan membentangkan sebuah perancangan jangka masa panjang untuk 30 tahun ke hadapan dalam mencorak masa depan dan hala tuju negara di mana setiap Rancangan Malaysia 10 tahun, lima tahun dan belanjawan negara akan diselaraskan berpandukan perancangan tersebut.

Walaupun terdapat dasar sedia ada, tetapi perancangan ini tidak cukup kukuh untuk merancang secara holistik dan menyelesaikan '*complexity*' kerana tempoh adalah singkat dan sederhana. Kerajaan boleh mencontohi negara serantau dengan menyelaraskan rancangan 5 tahun dengan strategi jangka panjang, di mana setiap pelan dan dasar harus selari dengan visi jangka panjang.

Penjajaran strategik ini akan meningkatkan daya tahan negara dan meletakkan Malaysia sebagai pemain berdaya saing di peringkat global. Setiap RMK seharusnya berfungsi sebagai batu loncatan untuk mencapai wawasan keseluruhan, membolehkan peruntukan sumber yang lebih berkesan dan responsif kepada cabaran yang muncul."

[Menteri Ekonomi]

7. PR-1541-U(27)370

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk menubuhkan jawatankuasa khas yang terdiri daripada pelbagai Kementerian untuk mengkaji mekanisme memastikan kemampanan sistem penjagaan kesihatan dalam negara.

Perkhidmatan kesihatan awam, yang sudah mengalami tekanan seperti peningkatan permintaan, had kewangan dan ketidaksamaan dalam akses kepada penjagaan. Jawatankuasa khas merentas Kementerian berperanan menangani kebimbangan ini dan meneroka mekanisme pembiayaan yang inovatif dan inklusif.

Dengan mengutamakan kemampanan penjagaan kesihatan, kita boleh memastikan penjagaan kesihatan yang berkualiti kekal dapat diakses oleh semua rakyat, tanpa mengira status kewangan mereka, di samping mengurangkan beban kewangan kepada Kerajaan."

[Menteri Kesihatan]

8. PR-1541-U(27)371

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk mengorientasikan semula dasar penyelidikan dan pembangunan (R&D) untuk memupuk inovasi yang lebih besar dalam syarikat dengan meningkatkan kerjasama dengan universiti.

Dengan mewujudkan hubungan yang lebih kukuh antara penyelidikan akademik dan industri, matlamatnya adalah untuk memacu lebih banyak inovasi yang dikomersialkan yang boleh bersaing di peringkat global.

Pada masa yang sama, Kerajaan perlu meningkatkan fungsi institusi penyelidikan Kerajaan dengan memudahkan pemindahan teknologi global dan membantu syarikat tempatan memanfaatkan teknologi termaju.

Dengan menyediakan akses kepada sumber teknologi sedia ada, Kerajaan membolehkan syarikat memanfaatkan inovasi ini untuk pembangunan produk dan pertumbuhan perniagaan, akhirnya meningkatkan kelebihan daya saing Malaysia dalam pasaran global."

[Menteri Sains, Teknologi dan Inovasi]

9. PR-1541-U(27)372

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan kertas putih strategi jangka pendek, sederhana dan panjang bagi menguatkuasakan peraturan yang lebih ketat mengenai penyelenggaraan kenderaan dan keselamatan muatan, meningkatkan pemeriksaan, dan mengenakan penalti yang lebih tinggi bagi pelanggaran peraturan jalan raya.

Statistik menunjukkan 825 kenderaan berat terlibat dalam kemalangan maut dalam tempoh sepuluh bulan pertama tahun ini, menyumbang kepada sebahagian besar daripada 17,905 kemalangan maut.

Latihan tetap untuk pemandu kenderaan berat, ditambah dengan keperluan pelesenan yang dipertingkatkan, akan memastikan amalan keselamatan jalan raya yang lebih baik. Pelaburan dalam infrastruktur dan teknologi jalan raya, seperti sistem keselamatan dalam trak, juga penting untuk meminimumkan risiko. Kempen kesedaran awam dan pengumpulan data yang lebih baik boleh menyasarkan lagi tempoh berisiko tinggi, seperti musim perayaan, untuk mencegah kemalangan dan meningkatkan keselamatan jalan raya secara keseluruhan."

[Menteri Pengangkutan]

10. PR-1541-U(27)384

Dato' Seri Dr. Shahidan bin Kasim [Arau] akan mencadangkan :

“Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia.

Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi. Memohon pihak Kerajaan mengambil tindakan dengan kadar segera.”

[Menteri Pertanian dan Keterjaminan Makanan]

11. PR-1541-U(27)385

Dato' Seri Dr. Shahidan bin Kasim [Arau] akan mencadangkan :

“Bahawa Dewan Rakyat ini menggesa supaya Kerajaan mengambil langkah proaktif dalam menangani kes penderaan kanak-kanak yang berlarutan dan sehingga kini belum ada penyelesaian tuntas. Statistik Kementerian Pembangunan Wanita, Keluarga dan Masyarakat menunjukkan sehingga November 2023, kira-kira 1,069 kes penderaan kanak-kanak dilaporkan yang disebabkan oleh kecuaian ibu bapa dan penjaga.

Kanak-kanak adalah masa depan negara. Usaha menangani isu pengabaian dan penderaan kanak-kanak yang dilihat membimbangkan perlu ditangani secara menyeluruh dan membabitkan pelbagai pihak.

Lantaran itu, pihak Kerajaan wajar menangani pantas menghentikan kitaran dera ini dengan target ‘Dera Sifar’ menerusi langkah-langkah proaktif seperti mewajibkan kursus penjagaan anak, mewujudkan sistem pemantauan berkala serta meneliti semula undang-undang serta garis panduan yang berkaitan. Perkhidmatan dalam hal membabitkan perlindungan, pemulihan dan pemeliharaan kanak-kanak perlu diperkukuh dan direalisasikan. Memohon pihak Kerajaan mengambil tindakan dengan kadar segera.”

[Menteri Dalam Negeri]

12. PR-1541-U(27)386

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan asas seperti beras tempatan, ayam dan telur ayam di pasaran.

Perancangan penyelesaian jangka pendek, jangka panjang yang komprehensif serta penguatkuasaan yang lebih 'keras' terhadap golongan kartel orang tengah antara faktor pengukuhan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan.

Kerajaan tidak seharusnya melepaskan tanggungjawab menjaga keterjaminan bekalan makanan kepada pengguna sebagai *end user* mahupun menyarankan penyelesaian jalan mudah seperti menambah import makanan tetapi perlu mencari penyelesaian sepanjang rangkaian jaringan bekalan bahan makanan mentah bagi memastikan keterjaminan makanan (*food security*). Memohon pihak Kerajaan mengambil tindakan dengan kadar segera."

[Menteri Pertanian dan Keterjaminan Makanan]

13. PR-1541-U(27)387

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan sering kali mendatangkan kerugian besar hingga jutaan ringgit setiap kali berlaku bencana alam.

Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka. Memohon pihak kerajaan mengambil tindakan dengan kadar segera."

[Menteri Pertanian dan Keterjaminan Makanan]

14. PR-1541-U(27)388

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron.

Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan.

Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan.

Mohon pihak Kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara. Memohon pihak Kerajaan mengambil tindakan dengan kadar segera."

[Perdana Menteri]

15. PR-1541-U(27)389

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMKe-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan.

Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan negeri khususnya di Perlis untuk mempelbagaikan fungsi sesuatu projek sedangkan Kerajaan negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu.

Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek. Memohon pihak Kerajaan mengambil tindakan dengan kadar segera."

[Menteri Ekonomi]

16. PR-1541-U(27)390

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar *rebranding* daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan.

Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja.

Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. Memohon pihak Kerajaan mengambil tindakan dengan kadar segera."

[Menteri Perumahan dan Kerajaan Tempatan]

17. PR-1541-U(27)391

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media.

Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan.

Oleh hal demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu. Memohon pihak Kerajaan mengambil tindakan dengan kadar segera."

[Menteri Komunikasi]

18. PR-1541-U(27)392

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan mengkaji semula kawasan masuk dan keluar sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu.

Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket pemerdagangan manusia yang dipercayai etnik Rohingya.

Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu.

Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka. Memohon pihak Kerajaan mengambil tindakan dengan kadar segera."

[Menteri Dalam Negeri]

19. PR-1541-U(27)393

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan mengkaji semula dasar sedia ada yang berkaitan Warisan Arkeologi Negara dan merangka satu pelan tindakan khusus bagi memartabatkan Warisan Arkeologi Negara yang ditemukan. Penemuan-penemuan arkeologi seperti artifak tembikar, seramik, lukisan purba, rangka manusia purba dan lain-lain artifak amat penting untuk dihayati dan dipelajari kerana data yang dihasilkan dapat membantu merungkai persoalan-persoalan tentang perkembangan hidup dan tamadun manusia silam.

Malahan, ia juga boleh dijadikan sebagai salah satu sumber rujukan pensejarahan negara yang utama. Akan tetapi masih banyak lagi tapak-tapak penemuan arkeologi yang ditemukan tidak dikaji sepenuhnya kerana beberapa faktor terutamanya kekangan kewangan hingga menyebabkan kebanyakan tapak tersebut ditinggalkan tanpa sebarang kajian menyeluruh mahupun pemeliharaan khusus.

Oleh yang demikian, Kerajaan melalui Kementerian Pelancongan, Seni dan Budaya (MOTAC) wajar mengkaji dan merangka satu pelan tindakan bagi memartabatkan Warisan Arkeologi Negara yang ditemukan supaya tapak-tapak arkeologi tersebut dapat dijadikan sebagai subjek kebanggaan dan identiti negara yang berbilang kaum dan agama yang boleh dihayati dan diambil iktibar.

MOTAC amnya boleh mengambil contoh kerangka tindakan daripada negara lain seperti China, Korea, Jepun dan Turki tentang kaedah-kaedah kajian, pemeliharaan dan pemuliharaan yang telah mereka berjaya lakukan melalui kerjasama strategik antara negara.

Hal ini juga sekaligus akan dapat menangani isu kemerosotan minat generasi muda terhadap Sejarah kerana generasi ini dilihat lebih cenderung untuk mengikuti perkembangan teknologi digital dan hiburan. Pembentukan generasi muda yang bakal menjadi pemimpin negara amat penting melalui pendekatan sejarah ini agar semangat kenegaraan atau cinta akan negara itu dapat dipupuk sebaiknya. Memohon pihak Kerajaan mengambil tindakan dengan kadar segera."

[Menteri Pelancongan, Seni dan Budaya]

20. PR-1541-U(27)394

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menyegerakan kelulusan dan penyaluran peruntukan pembangunan infrastruktur dan kemudahan terutamanya melibatkan penurapan tar di jalan-jalan yang menghubungkan laluan ke perkampungan Orang Asli dan memperbanyakkan pemasangan lampu jalan di Nenggiri, Kelantan.

Dalam Pilihan Raya Kecil (PRK) Dun Nenggiri baru-baru ini, pihak Kerajaan telah mengetahui bahawa kawasan tersebut memerlukan peruntukan pembangunan infrastruktur dan kemudahan yang menyeluruh khususnya di kawasan perkampungan Orang Asli seperti Pos Gob, Pos Tohoi, Pos Simpoh dan Pos Pasik.

Oleh yang demikian, Kerajaan melalui Kementerian Kemajuan Desa dan Wilayah (KKDW) wajar mengambil perhatian dan tindakan segera terhadap kekurangan infrastruktur dan kemudahan di kawasan perkampungan Orang Asli di Nenggiri Kelantan kerana mereka juga adalah sebahagian daripada rakyat negara ini yang mempunyai hak untuk menikmati segala kemudahan yang disediakan kerajaan. Memohon pihak Kerajaan mengambil tindakan dengan kadar segera."

[Menteri Kemajuan Desa dan Wilayah]

21. PR-1541-U(27)395

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan Persekutuan melaksanakan pembayaran royalti petroleum kepada negeri Terengganu dan Kelantan sebagai komitmen dalam memastikan pengagihan hasil petroleum yang adil dan saksama.

Tuntutan ini adalah selaras dengan hak rakyat dan negeri sebagaimana termaktub dalam Akta Kemajuan Petroleum 1974. Kedudukan pelantar minyak juga bersetentang dengan kawasan perairan negeri Terengganu dan Kelantan. Prinsip Federalisme perlu dihormati dan dipatuhi Kerajaan Persekutuan dengan menunaikan hak yang dituntut oleh rakyat di kedua-dua negeri tersebut. Memohon pihak Kerajaan mengambil tindakan dengan kadar segera."

[Menteri Kewangan]

22. PR-1541-U(27)396

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan Persekutuan melaksanakan pembayaran Wang Ehsan kepada negeri-negeri di bawah pentadbiran Pembangkang. Pembangunan seimbang antara wilayah amat penting agar rakyat menikmati kemudahan infrastruktur dan kemudahan yang setara. Bantuan Wang Ehsan ini akan dapat membantu negeri-negeri tersebut melaksanakan agenda pembangunan dan kesejahteraan rakyat amnya. Memohon pihak Kerajaan mengambil tindakan dengan kadar segera."

[Perdana Menteri]

23. PR-1541-U(27)397

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan memberikan sepenuh perhatian kepada Beting Patinggi Ali, yang juga dikenali sebagai Luconia Shoals, terletak di perairan Sarawak dan merupakan sebahagian daripada Zon Ekonomi Eksklusif (EEZ) Malaysia. Isu pencerobohan oleh kapal dan pesawat asing, terutamanya dari China telah menjadi persoalan rakyat memandangkan ia berkaitan dengan kedaulatan negara dan kepentingan awam. Sejak tahun 2013, Malaysia telah melaporkan pencerobohan berulang oleh kapal Pengawal Pantai China (CCG) di kawasan ini. Tuntutan China terhadap Beting Patinggi Ali dianggap tidak berasas kerana lokasi geografi kawasan tersebut yang lebih dekat dengan pantai Malaysia (84 nautica miles dari Miri) berbanding dengan tanah besar China (sekitar 1000 nautica miles).

Walaupun Malaysia menganggap Beting Patinggi Ali sebagai miliknya, Kerajaan masih berpendirian terdapat tuntutan bertindih dengan China. China menuntut sebagian besar wilayah di Laut China Selatan berdasarkan garis sembilan dash yang mereka tetapkan, yang telah ditolak oleh Mahkamah Permahan Tetap (PCA) pada tahun 2016. Keputusan PCA ini memberikan Malaysia posisi yang lebih kuat untuk menegaskan haknya di kawasan tersebut.

Untuk memastikan kedaulatan ke atas Beting Patinggi Ali, Malaysia perlu meningkatkan lagi kehadiran aset ketenteraan di kawasan tersebut bagi mengukuhkan tuntutan negara terhadap pulau tersebut dan mempergiatkan keberadaan Malaysia di pulau berkenaan. Mohon kerajaan untuk lebih tegas dalam pendiriannya di mana isu Beting Patinggi Ali adalah hak mutlak Malaysia sepertimana termaktub dalam Konvensi Bangsa-Bangsa Bersatu tentang Hukum Laut (UNCLOS) dan bukannya tuntutan bertindih dengan mana-mana negara asing. Memohon pihak Kerajaan mengambil tindakan dengan kadar segera."

[Menteri Pertahanan]

24. PR-1541-U(27)398

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan memberikan hak royalti kepada negeri Kelantan yang tidak dibayar oleh Kerajaan Persekutuan sering kali menjadi perdebatan hangat, terutamanya berkaitan dengan alasan "lebih 3 batu nautika". Kelantan, sebagai salah satu negeri pengeluar minyak di Malaysia, telah lama menuntut hak royalti minyak yang sepatutnya diterima. Namun, Kerajaan Persekutuan berpendapat bahawa Kelantan tidak layak menerima royalti tersebut kerana kedudukan telaga minyak yang terletak lebih dari tiga batu nautika dari pesisir pantai negeri tersebut.

Kerajaan Persekutuan perlu menyemak atau meminda kembali istilah "tiga batu nautika" yang tidak pernah dinyatakan dalam perjanjian asal dengan Petronas. Berpendapat bahawa Akta 144 tidak menetapkan jarak tertentu untuk hak milik telaga minyak. Tambahan lagi, Telaga minyak yang dimiliki Kelantan terletak kira- kira 80 batu nautika dari pesisir pantai, dan terdapat dakwaan bahawa telaga-telaga ini berada dalam kawasan yang dipertikaikan antara Kelantan dan Terengganu. Ini menimbulkan persoalan mengenai keadilan dan keseragaman dalam pembayaran royalti, terutama apabila negeri-negeri lain seperti Terengganu menerima royalti walaupun telaga mereka juga terletak jauh dari pantai.

Dicadangkan penubuhan jawatankuasa bebas yang terdiri daripada wakil Kerajaan negeri, Kerajaan Persekutuan dan pakar undang-undang untuk meneliti semula perjanjian royalti dan isu-isu berkaitan. Ini dapat memastikan bahawa semua pihak terlibat dalam proses perbincangan yang adil dan terbuka serta mencari penyelesaian yang memuaskan kedua-dua belah pihak. Memohon pihak Kerajaan mengambil tindakan dengan kadar segera."

[Menteri Kewangan]

25. PR-1541-U(27)399

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan untuk mempertimbangkan pembinaan jalan sempadan antara Malaysia dan Indonesia, khususnya di kawasan Sabah dan Kalimantan ini adalah penting untuk pelbagai aspek yang melibatkan ekonomi, keselamatan, dan pembangunan infrastruktur yang akan memulangkan hasil lumayan kepada Malaysia. Didapati bahawa jalan sempadan Malaysia – Indonesia ini akan meningkatkan kebolehcapaian antara kedua-dua negara, memudahkan pergerakan barang dan perkhidmatan. Ini akan merangsang aktiviti ekonomi di kawasan sempadan seperti Kalabakan dan Serudong, serta meningkatkan peluang perniagaan bagi penduduk tempatan.

Diingatkan, dengan pemindahan ibu negara Indonesia ke Kalimantan Timur (Nusantara), terdapat potensi besar untuk pertumbuhan ekonomi di kawasan sempadan. Pembinaan jalan akan membolehkan Sabah memanfaatkan perkembangan ini dengan lebih baik, termasuk dalam sektor pelancongan dan perdagangan rentas sempadan. Jalan sempadan ini dapat menghubungkan kampung-kampung pedalaman dengan bandar-bandar utama, memudahkan akses kepada pendidikan, kesihatan, dan peluang pekerjaan bagi penduduk di kawasan terpencil.

Pembinaan jalan sempadan Malaysia – Indonesia juga berpotensi memperkukuhkan hubungan sosial dan budaya antara masyarakat di kedua-dua negara. Ini termasuk pertukaran budaya melalui pelbagai aktiviti sosial dan ekonomi yang dapat dijalankan lebih mudah dengan adanya infrastruktur yang baik. Memohon pihak Kerajaan mengambil tindakan dengan kadar segera."

[Perdana Menteri]

26. PR-1541-U(27)376

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera memperbaharui dasar insentif kenderaan diesel komersial menerusi penetapan piawaian Euro 5 sebagai keperluan minimum menjelang tahun 2026 bagi menggalakkan peralihan yang lebih pantas terhadap penggunaan teknologi rendah emisi dan secara tidak langsung menyumbang sebagai penyelesaian jangka panjang dalam menjaga kualiti udara negara.

Pada ketika ini, negara-negara jiran telah mula mengorak langkah lebih ke hadapan seperti Singapura yang telah lama beralih kepada penggunaan Euro 6 dan Thailand yang menerapkan Euro 5 sebagai piawaian minimum sedangkan Malaysia hanya melaksanakan piawaian Euro 4 mulai Januari 2025 dengan pemberian insentif 50 peratus kepada semua kenderaan yang memenuhi piawaian tersebut.

Ketinggalan ini ternyata menjejaskan daya saing Malaysia di peringkat serantau di samping meningkatkan risiko kesihatan sejagat akibat pelepasan nitrogen oksida dan zarah halus.

Kerajaan wajar mempercepatkan peralihan ini bagi memastikan pengurangan pelepasan bahan pencemar selaras dengan Peraturan-Peraturan Kualiti Alam Sekeliling (Kawalan Kandungan Bahan Api Petrol dan Diesel) 2007. Penguatkuasaan yang ketat dan sokongan infrastruktur yang lebih baik menerusi kerjasama rapat Kerajaan bersama pemain industri perlu disinergikan untuk memastikan peralihan ini kelak berjalan lancar."

[Menteri Sumber Asli dan Kelestarian Alam]

27. PR-1541-U(27)377

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera mengkaji semula kadar pelepasan cukai untuk individu dan tanggungan yang kini masih berjumlah RM9,000 dan tidak pernah disemak sejak tahun 2010.

Setelah 15 tahun berlalu, inflasi telah meningkat dengan ketara dan amaun tersebut tidak lagi realistik jika dibandingkan kos sara hidup pada hari ini. Atas pertimbangan tersebut, Kerajaan wajar menaikkan amaun pelepasan diri dan tanggungan ke RM12,000 yang bersamaan dengan RM1,000 setiap bulan, bagi menggambarkan senario serta realiti sebenar kehidupan rakyat Malaysia pada hari ini.

Malah dengan peningkatan amaun pelepasan cukai untuk individu dan tanggungan ini secara tidak langsung akan membantu golongan B40 dan M40 yang amat terkesan dengan inflasi dan seterusnya mencerminkan keprihatinan Kerajaan dalam mengurangkan beban rakyat."

[Menteri Kewangan]

28. PR-1541-U(27)378

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk memartabatkan pengamalan Rukun Negara dalam menjadi tonggak identiti, perpaduan dan keutuhan rakyat Malaysia.

Mutakhir ini, negara disajikan dengan berita dan laporan mengenai kes- kes penyebaran ucapan kebencian, penghinaan dan provokasi yang berbaur perkauman, ketegangan kaum, penipuan dan penegasan unsur- unsur subversif yang berpotensi mencetuskan ketegangan antara kaum dan agama di Malaysia menerusi pengguna di platform media sosial.

Media sosial hari ini juga kian dipenuhi dengan lambakan sikap ketidaksopanan dan kebiadaban dalam perbincangan sehingga menjadi seperti satu kelaziman untuk para pengguna media sosial menggunakan bahasa kasar, lucah malah menyerang peribadi antara satu sama lain sehingga mengabaikan nilai kesopanan.

Hal ini mencerminkan kelemahan penghayatan nilai serta elemen Rukun Negara itu sendiri dalam kalangan rakyat Malaysia dan justeru itu, menjadi tanggungjawab Kerajaan untuk mewujudkan sebuah mekanisme yang lebih berkesan dalam menyuburkan pembudayaan setiap prinsip yang terkandung di dalam Rukun Negara sebagai penawar bagi menangani gejala kebejatan akhlak sebegini di platform media sosial. "

[Menteri Perpaduan Negara]

29. PR-1541-U(27)379

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mengkaji semula cukai korporat Malaysia yang sehingga kini adalah antara yang tertinggi di Asia Tenggara iaitu sebanyak 24 peratus berbanding negara-negara jiran lain seperti, Singapura (17 peratus), Brunei (18.5 peratus), Cambodia (20 peratus), Vietnam (20 peratus), Thailand (20 peratus), dan Indonesia sekitar 21 peratus.

Perbandingan ini semakin jelas jika dilihat dengan situasi kadar cukai Amerika Syarikat (AS). Pada tahun 2016, cukai korporat mereka adalah sekitar 35 peratus, namun kini cukai korporat mereka telah turun sehingga 21 peratus manakala Malaysia kekal pada kadar sama iaitu 24 peratus sehingga sekarang.

Kadar cukai korporat yang tinggi ini ternyata melemahkan daya saing Malaysia untuk bersaing dengan negara-negara jiran bagi menarik tumpuan pelabur untuk melabur di sini.

Oleh yang demikian, Kerajaan perlu merangka satu kajian yang lebih komprehensif bagi menurunkan kadar cukai korporat ini agar setanding dengan kadar serantau untuk menjadikan Malaysia lebih kompetitif serta berdaya maju dalam meraih tumpuan pelabur antarabangsa yang akhirnya akan menguntungkan negara, peniaga dan rakyat jelata. "

[Menteri Kewangan]

30. PR-1541-U(27)380

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk memastikan kenaikan caj perubatan di hospital dan klinik swasta yang semakin mendapat perhatian di kebanyakan negara termasuk di Malaysia segera ditangani dengan baik oleh Kerajaan memandangkan implikasinya yang besar kepada para pesakit serta sistem kesihatan negara secara keseluruhannya.

Pelbagai faktor mendorong kepada isu ini dengan antaranya ialah kadar caj konsultasi doktor (GP) swasta yang dikawal oleh Akta Kemudahan dan Perkhidmatan Jagaan Kesihatan Swasta (PHFSA) 1998 tidak pernah mengalami sebarang perubahan selama lebih 32 tahun dan menyebabkan pihak terbabit terpaksa menaikkan caj kos operasi yang semakin meningkat, termasuk sewa premis, kos utiliti, peralatan perubatan serta perbelanjaan berkaitan teknologi dan sumber manusia telah meletakkan tekanan besar ke atas klinik swasta.

Situasi tersebut juga diburukkan lagi oleh isu berkaitan Pentadbir Pihak Ketiga (TPA) yang menguruskan pembayaran bagi pesakit yang mempunyai insurans kesihatan yang turut mengalami kenaikan.

Oleh yang demikian, Kerajaan digesa untuk meminda Akta Perkhidmatan Hospital Swasta bagi menetapkan kadar maksimum bagi caj rawatan selain konsultasi doktor, seperti caj penginapan dan penggunaan alat perubatan selain memperkenalkan sistem tiering seperti penarafan hotel bagi membezakan hospital berdasarkan tahap perkhidmatan, membolehkan syarikat insurans menawarkan pelbagai pakej berdasarkan akses kepada hospital tertentu, sesuai dengan kemampuan pelanggan serta mempergiat inisiatif di bawah kerjasama awam dan swasta bagi menyediakan rawatan mampu milik kepada golongan berpendapatan rendah. "

[Menteri Kesihatan]

31. PR-1541-U(27)381

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mempertimbangkan semula keputusan Kumpulan Wang Simpanan Pekerja (KWSP) yang menjual hampir 10 peratus kepentingan saham ketika harga rendah selepas Disember 2022, sedangkan KWSP telah lama merancang untuk menambah lebih banyak saham Malaysia Airports Holdings Bhd (MAHB) untuk menswastakannya.

Pada 29 November 2022, KWSP telah memiliki 259,917,492 saham iaitu sekitar 15.67 peratus di dalam MAHB dan dalam tempoh satu tahun, KWSP telah menjual 163,363,080 saham, atau hampir 10 peratus kepentingan pada harga sekitar RM6.74 hingga RM7.70 sesaham. Manakala pada 28 Disember 2023 pula, akhirnya KWSP hanya memiliki 96,554,412 saham atau 5.79 peratus sahaja.

Penjualan sebegitu besar dalam tempoh singkat tidak pernah berlaku sebelum ini dan ini menimbulkan persoalan mengapa saham tersebut dijual pada harga rendah tetapi dibeli semula pada harga RM11.00 dengan implikasinya ialah KWSP akan terpaksa membayar tambahan sebanyak RM539 juta sehingga RM696 juta bagi membeli balik saham tersebut.

Justeru itu, Kerajaan digesa untuk mempertimbang dan mengkaji semula keputusan ini dengan lebih berhati-hati memandangkan perkara ini telah menimbulkan keresahan awam kerana membabitkan dana 16.1 juta rakyat Malaysia yang merupakan pencarum KWSP. "

[Menteri Kewangan]

32. PR-1541-U(27)382

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk kembali mempertimbangkan pelaksanaan Cukai Barangan dan Perkhidmatan (GST). Dengan mengambil kira implikasi ekonomi Malaysia yang pada masa ini berada pada tahap yang agak baik serta kestabilan Kerajaan Perpaduan pimpinan YAB Perdana Menteri yang semakin mengukuh, telah ramai pihak termasuklah penganalisis bank berpendapat sekarang adalah masa yang tepat untuk Kerajaan memperkenalkan semula GST.

Menerusi GST, Kerajaan berpotensi untuk meluaskan lagi asas cukai bagi mengurangkan defisit fiskal, mewujudkan ruang utama untuk pelaburan infrastruktur serta menghasilkan peluang bagi mengawal hutang negara dengan lebih baik. Malah, dengan pelaksanaan berperingkat e-invois bermula 1 Ogos 2024, yang juga merupakan antara komponen GST, telah memberikan ruang yang baik untuk Kerajaan melaksanakan kembali GST.

Malaysia tidak harus tertinggal di belakang negara Asia Tenggara lain yang telah melaksanakan GST seperti Indonesia yang melaksanakan Value Added Tax (VAT) pada 1985, Thailand pada tahun 1992 dan Singapura pada 1994 selain GST ini telah dilaksanakan di lebih 170 negara.

Kerajaan boleh menstrukturkan semula GST dengan lebih kemas melalui kerangka dasar yang komprehensif meliputi semua barangan dan perkhidmatan dengan sesetengah barangan boleh dikecualikan, selain satu kadar cukai yang dianggap positif. "

[Menteri Kewangan]

33. PR-1541-U(27)383

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk menimbangkan pengecualian daripada pengeluaran e-Invois kepada Perusahaan Mikro, Kecil dan Sederhana (PMKS) yang mempunyai jualan tahunan di bawah RM500,000 berbanding ketetapan semasa Kerajaan iaitu pengecualian untuk peniaga yang mencatatkan jualan tahunan bawah RM150,000 menjelang pelaksanaan menyeluruh e-Invois bermula 1 Julai 2025.

Pelaksanaan e-Invois ini ternyata telah mewujudkan kebimbangan dalam kalangan para pemain PMKS yang terpaksa menghadapi kekangan kos berikutan perbelanjaan yang tinggi bagi menyediakan sistem pengeluaran serta penyelenggaraan e-Invois di samping risiko margin keuntungan yang rendah.

Peningkatan siling pengecualian e-Invois kepada RM500,000 adalah lebih relevan seperti mana yang pernah dilakukan oleh Kerajaan ketika melaksanakan Cukai Barangan dan Perkhidmatan (GST) sebelum ini dan sekaligus mengurangkan beban lebih banyak segmen pemain PMKS seperti pengusaha yang berniaga dari rumah, ibu tunggal dan peniaga luar bandar yang terpaksa menanggung bebanan implikasi kos yang tinggi.

Oleh yang demikian, Kerajaan disaran untuk mempertimbangkan syor peningkatan pengecualian kepada RM500,000 ini bagi mengurangkan keresahan pemain PMKS dengan pelaksanaan e-Invois yang sebenarnya boleh dielakkan sekiranya Kerajaan memperkenalkan semula GST. "

[Menteri Kewangan]

34. PR-1541-U(27)373

Dato' Sri Dr. Wee Jeck Seng [Tanjung Piai] akan mencadangkan :

"Bahawa Dewan Rakyat ini menggesa Kerajaan untuk melaksanakan kajian secara holistik dan komprehensif bagi menghasilkan benih padi yang berkualiti serta mampu bertahan dalam keadaan perubahan cuaca ekstrem di Malaysia.

Kebelakangan ini perubahan iklim yang ketara telah menjejaskan hasil pengeluaran padi tempatan sebanyak 83,408 tan metrik bersamaan 5.84 juta 10 kilogram pek beras disebabkan oleh musim tengkujuh dan banjir. Penjadualan penanaman padi amat terdedah dengan bencana banjir di musim tengkujuh pada hujung tahun manakala musim penanaman semula padi pada awal tahun pula berisiko diancam keadaan cuaca panas melampau yang perlu diatasi dengan kadar segera.

Sehubungan itu, pihak Kerajaan perlu mengambil langkah yang lebih tegas dan efisien dalam menangani isu ini yang bukan sahaja bagi mempercepatkan pengagihan benih padi kepada pesawah supaya jadual penanaman padi tidak terganggu, malah pihak Kerajaan juga perlu membuat kajian yang teliti bagi menghasilkan benih padi yang lebih berdaya tahan dengan perubahan iklim di Malaysia."

[Menteri Pertanian dan Keterjaminan Makanan]

35. PR-1541-U(27)375

Dato' Sri Dr. Wee Jeck Seng [Tanjung Piai] akan mencadangkan :

"Bahawa Dewan Rakyat ini menggesa Kerajaan untuk menjalankan penelitian semula terhadap kajian bagi persediaan serta perancangan pelan pembangunan pendidikan jangka panjang bagi negara.

Mutakhir ini, kita telah dihabarkan pelbagai peristiwa yang menimbulkan kekusaran masyarakat terhadap ketandusan pembangunan modal insan negara ini terutamanya terhadap generasi baharu yang merupakan generasi yang bakal memimpin dan mentadbir negara tercinta satu hari nanti.

Situasi ini diburukkan lagi dengan statistik kegagalan para pelajar untuk menduduki Sijil Pelajaran Malaysia (SPM) yang hampir setiap tahun mencapai angka yang membimbangkan sehingga mencetuskan kebimbangan. Sejauh mana keseriusan generasi muda ini menilai kepentingan mendapatkan pendidikan untuk membina kehidupan yang lebih baik.

Dalam keadaan negara serantau yang kian pesat membangun, kesediaan dalam melahirkan modal insan menjadi sangat kritikal terutamanya bagi melahirkan generasi yang mampu berdaya saing dan mendepani cabaran serta persaingan dengan negara-negara serantau.

Oleh yang demikian, Kerajaan perlu mengambil pendekatan berstrategi menerusi pembangunan semula pelan pembangunan pendidikan yang lebih efisien bagi memastikan negara kita mampu untuk melahirkan pakej modal insan yang lengkap dan mampu berdaya saing."

[Menteri Pendidikan]

36. PR-1541-U(27)374

Kapten Dato' Dr. Zulkafperi bin Hanapi (Bersara) [Tanjong Karang] akan mencadangkan :

"Bahawa Dewan ini menggesa Kerajaan supaya melaksanakan segera Skim Pembiayaan Kesihatan Kebangsaan demi kepentingan kesejahteraan rakyat serta kemapanan dan kelestarian KKM itu sendiri.

Situasi semasa menunjukkan KKM sangat terbeban dengan belanja mengurus yang sangat tinggi iaitu sehingga 85.07% atau RM38 bilion daripada bajet keseluruhan KKM dan hanya 14.9% yang diperuntukkan untuk bajet pembangunan maka keadaan ini sangat tidak sihat untuk kemapanan dan kelestarian KKM itu sendiri.

Kelemahan, ketidakmampuan dan kegagalan KKM terlihat jelas dengan segala masalah-masalah yang sentiasa menjadi rungutan rakyat dan juga sering diangkat oleh ramai Ahli-ahli Parlimen - seperti kekurangan jururawat, kekurangan doktor dan doktor pakar serta masalah doktor kontrak, Kekurangan ambulans, ketiadaan ubat, alat-alat perubatan terlalu lama, klinik-klinik daif, hospital yang berumur lebih 50 tahun, hospital yang sesak, tiada sistem komputer, pesakit terpaksa menunggu terlalu lama.

Ketahuilah permasalahan dan segala kelemahan KKM ini sebenarnya adalah manifestasi dari kekangan fiskal KKM itu sendiri. Keupayaan KKM dengan 14.9% bajet untuk Pembangunan adalah sangat-sangat terbatas dan ini boleh menyebabkan kualiti dan mutu perkhidmatan KKM terjejas dan terus dipersoalkan rakyat.

Dengan situasi begini adalah diharapkan penyelesaian segera dan menyeluruh dengan menubuhkan Jawatankuasa Bertindak bagi melaksanakan segera Skim Pembiayaan Kesihatan Kebangsaan."

[Menteri Kesihatan]

37. PR-1541-U(27)400

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan menerima kewujudan Seksyen (1) Perkara 112C Bahagian 4 Jadual Kesepuluh dan Seksyen (2) Bahagian 4 Jadual Kesepuluh dalam Perlembagaan Persekutuan serta penguatkuasaannya dan menerima hakikat bahawa hak ini adalah hak-hak Perlembagaan Rakyat Sabah.

Menerima juga hakikat bahawa kekeliruan dalam pelaksanaan hak-hak perlembagaan ini dan bahawa selama 44 tahun (1974 – 2018), kadar pemberian khas di bawah peruntukan tersebut gagal dikaji oleh Kerajaan Persekutuan.

Memperakui langkah-langkah yang telah diambil oleh pihak Kerajaan selepas penubuhan Kerajaan Pakatan Harapan 2018 sehingga kini iaitu bermula dengan menaikkan pemberian kepada RM53.4 juta, kemudian dinaikkan Kerajaan Perikatan Nasional ke RM125.6 juta, pada tahun 2023, dan kemudian Kerajaan Madani naikan kepada RM300 juta dan baru-baru ini dinaikkan lagi kepada RM600 juta.

Dan menerima hakikat bahawa semua langkah-langkah ini bersifat sementara (interim) sebelum Kerajaan Sabah dan Kerajaan Persekutuan untuk melaksanakan hak Perlembagaan Rakyat Sabah sepenuhnya.

Menerima hakikat bahawa pelaksanaan ini mengambil masa begitu panjang sehingga sekarang iaitu negara Malaysia sudah berusia 61 tahun. Maka, Tuaran ingin mengusulkan supaya Dewan yang mulia ini membuat Keputusan untuk melaksanakan Hak Perlembagaan Rakyat Sabah ini secara tuntas termasuk meminda perkara 97(1) Perlembagaan Malaysia untuk membolehkan kerajaan Sabah memungut 40% daripada pungutan hasil Persekutuan daripada Sabah secara langsung."

[Perdana Menteri]

38. PR-1541-U(27)401

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima Sejarah perang saudara di Selatan Filipina pada awal 70-an yang mengakibatkan ribuan pelarian perang dari Filipina melarikan diri ke Sabah. Menerima hakikat bahawa Pertubuhan Bangsa-Bangsa Bersatu (PBB) melalui Suruhanjaya Tinggi Persekutuan Bangsa-Bangsa Bersatu Untuk Pelarian (UNHCR) telah turun padang dan membantu pelarian ini dengan mewujudkan sekurang-kurangnya lima (5) skim penempatan pelarian di Sabah (Telipok, Kinarut, Kampung Bahagia Sandakan, Kampung Selamat Semporna dan Kampung Hidayat Tawau).

Dan menerima hakikat Kerjaan Sabah telah bekerjasama dengan UNHCR sehingga mewujudkan sebuah bahagian di Jabatan Ketua Menteri untuk menguruskan penempatan UNHCR ini.

Menerima juga hakikat apabila setelah UNHCR menyerahkan penempatan ini kepada Federal Task Force di bawah Majlis Keselamatan Negara, terdapat kecelaruan dari segi urus tadbir pelarian perang Filipina di Sabah, sehinggakan penempatan mereka telah bercampur aduk dengan mereka yang bukan pelarian yang menyebabkan banyak masalah dari segi urus tadbir kewarganegaraan dan pelbagai aspek bantuan kemanusiaan.

Menerima hakikat bahawa pelarian perang Filipina ini telah diberi pelbagai dokumen bermula dengan kad burung-burung, kad banci dan selepas itu dokumen IMM13 sehingga sekarang. Menerima juga hakikat bahawa pelbagai pendekatan untuk menaik taraf bentuk dan cara pengeluaran dokumen ini telah banyak dipolitikkan dan akhirnya kini tidak ada kata putus apakah dokumen baru yang diberikan kepada golongan pelarian perang Filipina ini.

Menerima juga hakikat bahawa satu Suruhanjaya Siasatan Diraja telah ditubuhkan oleh Parlimen Malaysia mencari penyelesaian tuntas terhadap kehadiran golongan pelarian perang Filipina di Sabah, namun itu pun telah gagal memberi apa-apa penyelesaian, Malah ramai yang menganggap langkah ini sebagai mainan politik semata-mata.

Oleh sebab itu, Tuan mengesyorkan supaya Dewan yang mulia ini membahaskan masalah pelarian perang Filipina dengan mengambil kira bagaimanakah masa depan mereka yang kini sudah tiga generasi beranak pinak di Sabah sehingga Kerajaan dapat mengambil Tindakan yang tegas sebelum masalah ini menjadi lebih besar yang boleh menggugat kestabilan dan kedaulatan negara."

[Perdana Menteri]

39. PR-1541-U(27)402

Datuk Seri Panglima Madius Tangau [Tuan] akan mencadangkan :

"Bahawa Dewan Rakyat ini menggesa Kerajaan Menerima hakikat bahawa kos pembekalan elektrik (penjanaan, penghantaran dan pengagihan) di Sabah adalah lebih tinggi daripada kadar jualan seunit elektrik menyebabkan Sabah Electricity Sdn. Bhd (SESB) mengalami kerugian dan terpaksa bergantung kepada subsidi sokongan tarif (TSS) daripada Persekutuan dengan kadar RM850 juta setahun.

Menerima juga hakikat bahawa Kerajaan perlu mengambil langkah-langkah bagi memastikan penjanaan elektrik mencapai 40% rizab margin dan kos pembekalan elektrik berada di bawah paras jualan untuk mengurangkan beban Kerajaan Persekutuan dalam menampung subsidi sokongan tarif (TSS).

Oleh itu, maka dengan ini Tuan mengesyorkan agar Dewan yang mulia ini dapat membahaskan langkah-langkah yang boleh diambil sehingga Kerajaan dapat mencari jalan penyelesaian yang tepat untuk menstabilkan bekalan elektrik di Sabah."

[Menteri Peralihan Tenaga dan Transformasi Air]

40. PR-1541-U(27)403

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima hakikat bahawa import makanan negara masih lagi tinggi termasuklah makanan ternakan.

Dan menerima hakikat bahawa tanah yang masih luas untuk dimajukan sebagai tanah pertanian terdapat di Sabah dan Sarawak.

Menerima juga hakikat infrastruktur perhubungan masih lagi pada tahap yang rendah menyebabkan pelbagai usaha untuk meningkatkan keterjaminan makanan terhalang.

Maka itu, Tuaran mengusulkan agar Dewan yang mulia ini ditangguhkan untuk membincangkan langkah-langkah dalam mengatasi dan menaik taraf jalan-jalan pertanian di Sabah dan Sarawak."

[Menteri Pertanian dan Keterjaminan Makanan]

41. PR-1541-U(27)404

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima Hakikat bahawa kawal selia bekalan elektrik di Sabah telah pun diserahkan kepada Kerajaan Sabah daripada Kerajaan Persekutuan selepas Kelulusan Rang Undang-Undang Pihak Berkuasa Tenaga Boleh Baharu (Pindaan) 2023 (Akta 725) dan Rang Undang-Undang Pihak Berkuasa Pembangunan Tenaga Lestari (Pindaan) 2023 (Akta 726) dalam Dewan Rakyat pada 2023.

Menerima hakikat penyerahan kawal selia telah dimuktamadkan selepas Dewan Undangan Negeri (DUN) Sabah meluluskan tiga Rang Undang-Undang Perlembagaan Negeri Sabah pada 3 Januari 2024 berkaitan pengambilalihan kuasa kawal selia bekalan elektrik daripada Kerajaan Persekutuan membabitkan RUU Bekalan Elektrik 2024, Tenaga Boleh Baharu 2024 dan RUU Suruhanjaya Tenaga Sabah (Pindaan) 2024.

Dan menerima hakikat bahawa kawal selia bekalan elektrik di Sabah kini berada di bawah Suruhanjaya Tenaga Sabah (ECoS), manakala Wilayah Persekutuan Labuan masih di bawah seliaan Suruhanjaya Tenaga (ST) Malaysia.

Menerima juga hakikat bahawa Syarikat Sabah Electricity Sdn. Bhd. (SESB) merupakan satu-satunya Syarikat utiliti yang membekalkan tenaga elektrik kepada Wilayah Sabah dan wilayah Persekutuan Labuan.

Dan menerima hakikat bahawa geografi Labuan adalah lebih dekat dengan Sabah berbanding dengan Semenanjung Malaysia.

Justeru, Tuaran mengesyorkan agar Dewan yang mulia ini ditangguhkan bagi membuat keputusan pemindahan kawal selia bekalan elektrik Labuan daripada ST kepada ECoS bagi memudahkan pemantauan, meningkatkan kecekapan pengurusan serta mempermudah segala urusan dan menjimatkan kos."

[Menteri Peralihan Tenaga dan Transformasi Air]

42. PR-1541-U(27)405

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima hakikat Sejarah bahawa Pulau Labuan diserahkan oleh Kerajaan Sabah menjadi Wilayah Persekutuan dengan niat suci untuk tujuan membangunkan Labuan dengan pesat.

Menerima hakikat Kerajaan Persekutuan telah gagal membangunkan Labuan termasuk menyediakan utiliti bekalan air dan elektrik.

Menerima hakikat bahawa rakyat Labuan adalah juga rakyat Sabah yang masih terikat dengan adat istiadat Sabah dan oleh itu masih lagi memerlukan perkhidmatan sistem Mahkamah Anak Negeri dan seterusnya memerlukan bimbingan dan perkhidmatan di pelbagai agensi Kerajaan Sabah.

Menerima hakikat bahawa penyerahan Labuan sebagai Wilayah Persekutuan telah dibuat tanpa mengambil kira kesan terhadap persempadanan Sabah.

Dan menerima hakikat penyerahan Labuan sebagai Wilayah Persekutuan tidak diberi pampasan walau satu sen pun kepada Sabah.

Menerima hakikat bahawa Pulau Labuan terlalu dekat dengan Sabah dan penduduk serta rakyat Labuan mempunyai ikatan yang sangat kuat dengan penduduk Sabah.

Maka dengan itu, Tuaran menyusulkan di Dewan yang mulia ini agar Kerajaan Persekutuan mengembalikan semula Labuan kepada Sabah."

[Perdana Menteri]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

<u>TAHUN 2025</u>	<u>RISALAT/DOKUMEN</u>	<u>TARIKH DIBENTANGKAN</u>
DR. 7	Penyata Jawatankuasa Kira-Kira Wang Negara (PAC) terhadap Tindakan Susulan Kementerian Pertahanan (MINDEF) dan Lembaga Tabung Angkatan Tentera (LTAT) bagi Syor-Syor Penyata PAC Parlimen berhubung Lembaga Tabung Angkatan Tentera (DR. 41 Tahun 2024)	4 Mac 2025
ST. 25	Laporan Tahunan dan Penyata Kewangan Lembaga Pembangunan Industri Pembinaan Malaysia (CIDB) Bagi Tahun 2023	4 Mac 2025

****UCAPAN-UCAPAN**
(PERATURAN MESYUARAT 17)
(KAMAR KHAS)

Ahli Yang Berucap	Tajuk Ucapan	Menteri Yang Bertanggungjawab
YB Tuan Tan Hong Pin (Bakri)	1. Pengecualian Tuntutan Royalti untuk Program Tidak Berorientasikan Keuntungan dan Pengenalan Mekanisme Tuntutan Royalti yang Telus	1. YB Menteri Perdagangan Dalam Negeri dan Kos Sara Hidup
YB Tuan Muhammad Ismi bin Mat Taib (Parit)	1. Pengezonan Jelapang Padi di Perak Tengah: Cabaran dan Cadangan Penambahbaikan 2. Menarik Pelaburan dan Meningkatkan Industri	1. YB Menteri Pertanian dan Keterjaminan Makanan 2. YB Menteri Pelaburan, Perdagangan dan Industri

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**